



Broj: 16-11-02-4197-1/16  
I. Sarajevo 23.06. 2016. godine

Na osnovu člana 8. stav (2) tačka a) Zakona o Državnoj agenciji za istrage i zaštitu („Službeni glasnik BiH“, br. 27/04, 63/04, 35/05, 49/09 i 40/12), člana 50. Zakona o policijskim službenicima Bosne i Hercegovine („Službeni glasnik BiH“, br. 27/04, 63/04, 5/06, 33/06, 58/06, 15/08, 63/08, 35/09 i 7/12) i člana 5. Odluke o načinu i programu testiranja kandidata u procesu odabira policijskih službenika („Službeni glasnik BiH“, broj 18/05) i Odluke o izmjenama i dopunama Odluke o načinu i programu testiranja kandidata u procesu odabira policijskih službenika broj: 01-02-329/06 od 17.08.2006. godine, direktor Državne agencije za istrage i zaštitu, d o n o s i

## **O D L U K U**

### **o metodu, načinu i sistemu bodovanja testiranja kandidata za polaznike osnovne obuke - kadeta u Državnoj agenciji za istrage i zaštitu**

#### **DIO PRVI-OPŠTE ODREDBE**

##### **Član 1. (Predmet)**

Ovom odlukom utvrđuje se metod, način i sistem bodovanja testiranja kandidata za polaznike osnovne obuke - kadeta za čin policajac i mlađi inspektor u Državnoj agenciji za istrage i zaštitu (u daljem tekstu: Agencija), način i postupak provjere opšteg znanja, fizičke sposobnosti, zdravstvene sposobnosti (ljekarski pregled i psihološki pregled uključujući test i intervju), testiranje poznavanja stranog jezika, psihofizičke izdržljivosti u ekstremnim situacijama, kao i ostala bitna pitanja koja se odnose na postupak izbora kandidata.

##### **Član 2. (Pristupanje testiranju)**

Procesu testiranja mogu pristupiti svi kandidati koji su se prijavili na Javni oglas i ispunjavaju opšte i posebne uslove propisane Zakonom o policijskim službenicima Bosne i Hercegovine (u daljem tekstu: Zakon) i Pravilnikom o unutrašnjoj organizaciji Državne agencije za istrage i zaštitu.

##### **Član 3. (Raspored testiranja)**

- (1) Kandidati se testiraju po sljedećem rasporedu:
- a) test opšteg znanja, uključujući pismeni rad;

- b) test fizičke sposobnosti;
- c) ljekarski pregled;
- d) psihološki pregled, uključujući test i intervju;
- e) drugi test koji Agencija smatra da je opravdan ili koristan i to:
  - 1) test poznavanja stranog jezika;
  - 2) usmeni test-intervju;
  - 3) test psihofizičke izdržljivosti u ekstremnim situacijama za kandidate prvog nivoa - čin policajac u Jedinici za specijalnu podršku ( u daljem tekstu: JSP).

(2) Izuzetno od odredbi iz stava (1) ovog člana u slučaju velikog broja kandidata koji su prošli testove iz tač. a) i b), kao i iz razloga ekonomičnosti postupka izbora, provjere iz stava (1) tač. c) i d) ovog člana izvršiće se na kraju postupka testiranja i to samo kandidata koji su izabrani za polaznike osnovne obuke.

## **DIO DRUGI - TESTIRANJE KANDIDATA ZA POLAZNIKE OSNOVNE OBUKE- KADETA ZA PRVI NIVO - ČIN POLICAJAC I ZA DRUGI NIVO-ČIN MLAĐI INSPEKTOR**

### **Član 4. (Morfološki status)**

(1) Kandidat prije testiranja mora da zadovoljava kriterije koji se odnose na morfološki status i to:

<b>Muškarci</b>
Tjelesna visina: 172 cm i više
Tjelesna težina: +10 i –10 kg u odnosu na visinu u cm - 100
<b>Žene</b>
Tjelesna visina: 162 cm i više
Tjelesna težina: +10 i –10 kg u odnosu na visinu u cm - 100

(2) Vaga kojom se utvrđuje tjelesna težina kandidata mora biti baždarena i certifikovana od strane nadležne institucije.

(3) Kandidat koji ne ispunjava kriterije morfološkog statusa, isključuje se iz daljeg procesa odabira.

### **Član 5. (Test opšteg znanja)**

- (1) Test opšteg znanja obuhvata sljedeće oblasti:
- a) interpretaciju;
  - b) gramatiku;
  - c) pisani test;
  - d) esej.

(2) Sadržaj testa opšteg znanja utvrđuje Komisija za izbor kandidata ( u daljem tekstu: Komisija) u skladu sa minimalnim stepenom obrazovanja potrebnim za nivo kome kandidat pristupa.

(3) Sadržaj pisanog testa Komisija utvrđuje najranije 24 sata prije započinjanja testiranja. Pisani test sastoji se od 20 pitanja sa ponuđenim odgovorima. Kandidat na listi za

odgovore označava tačan odgovor. Svaki tačan odgovor boduje se sa jednim bodom. Ukupan broj bodova na testu je 20 bodova.

(4) Pisanjem eseja kandidat obrađuje zadatak temu na način koji uključuje razmišljanje i zaključivanje, izražavanje ličnog stava, dosljednosti u zaključivanju i sklonost prema misaonoj razradi problematike. Kandidat pisanjem eseja može ostvariti najviše 20 bodova, u koje su uključeni bodovi za interpretaciju i gramatiku.

(5) Test opšteg znanja radi se dva sata sa pauzom čije trajanje određuje Komisija.

(6) Maksimalan broj bodova koje kandidat može ostvariti na testu opšteg znanja je 40.

(7) Kandidat koji ostvari manje od 24 boda za prvi nivo - čin policajac ili manje od 30 bodova za drugi nivo - čin mlađi inspektor isključuje se iz daljeg procesa odabira.

## **Član 6.**

### **(Ocjena testa opšteg znanja)**

(1) Test opšteg znanja ocjenjuje se ocjenom od 1 do 5, prema broju ostvarenih bodova, kako slijedi:

a) za polaznike osnovne obuke za prvi nivo - čin policajac:

- 1) do 23 boda.....ocjena 1;
- 2) od 24 do 30 bodova.....ocjena 2;
- 3) od 31 do 34 bodova.....ocjena 3;
- 4) od 35 do 37 bodova.....ocjena 4;
- 5) od 38 do 40 bodova.....ocjena 5.

b) za polaznike osnovne obuke za drugi nivo - čin mlađi inspektor:

- 1) do 29 boda.....ocjena 1;
- 2) od 30 do 32 bodova.....ocjena 2;
- 3) od 33 do 35 bodova.....ocjena 3;
- 4) od 36 do 38 bodova.....ocjena 4;
- 5) od 39 do 40 bodova.....ocjena 5.

(2) Kandidat koji bude ocijenjen ocjenom 1, odnosno na testu opšteg znanja ostvari manje od 24 boda za prvi nivo - čin policajac ili manje od 30 bodova za drugi nivo - čin mlađi inspektor, isključuje se iz daljnjeg postupka.

## **Član 7.**

### **(Test fizičke sposobnosti)**

(1) Kandidat dobrovoljno pristupa testiranju fizičke sposobnosti. U slučaju da se kandidat prilikom provjere fizičke sposobnosti povrijedi, Agencija ne snosi nikakvu odgovornost.

(2) Kandidat je obavezan prije pristupanja testu fizičke sposobnosti potpisati Izjavu da dobrovoljno pristupa testu fizičke sposobnosti, te da je upoznat da u slučaju njegovog povređivanja Agencija ne snosi nikakvu odgovornost. Izjava o dobrovoljnom pristupanju testovima fizičke sposobnosti data je u prilogu, na obrascu broj 1. koji je sastavni dio ove odluke.

(3) Testiranje fizičke sposobnosti kandidata vrši se primjenom osam testova:

a) Muškarci

R.br.	Naziv testa	Kriterij testa
1.	Sklekovi za 10 sekundi	9 i više
2.	Pretklon za 30 sekundi	16 i više
3.	Skok u dalj iz mjesta	210 cm i više
4.	Taping test za 20 sekundi	31 i više
5.	Magont	18 sekundi i manje
6.	Koverta test	30 sekundi i manje
7.	Kuperov test (test trčanja 12 minuta)	2.400 m i više
8.	Trčanje 100 metara	15,19 sekundi i manje

b) Žene

R.br.	Naziv testa	Kriterij testa
1.	Sklekovi za 10 sekundi	6 i više
2.	Pretklon za 30 sekundi	12 i više
3.	Skok u dalj iz mjesta	150 cm i više
4.	Taping test za 20 sekundi	29 i više
5.	Magont	19 sekundi i manje
6.	Koverta test	32 sekunde i manje
7.	Kuperov test (test trčanja 12 minuta)	1.700m i više
8.	Trčanje 100 metara	18,19 sekundi i manje

(4) Provjera fizičke sposobnosti kandidata provodi se na sljedeći način:

a) **Sklekovi za 10 sekundi**

- 1) Instrumenti: štoperica.
- 2) Zadatak: kandidat zauzima položaj na rukama tako da prstima nogu i dlanovima dodiruje podlogu. Tijelo i ruke zauzimaju položaj pravog ugla. Iz te pozicije kandidat se spušta naprežući mišiće sve dok grudima ne dodirne podlogu, a zatim se ponovo podigne u prvobitni položaj. Kandidat svo vrijeme drži opruženo tijelo. Tijelo se ne smije njihati naprijed i nazad pri spuštanju. Laktovi pri spuštanju i podizanju moraju prolaziti pored tijela. Žene rade test sa koljena.
- 3) Ocjenjivanje: ocjenjuje se broj pravilno izvedenih i dovršenih sklekova u intervalu od 10 sekundi.

b) **Pretklon za 30 sekundi**

- 1) Instrumenti: štoperica.
- 2) Zadatak: kandidat leži na leđima, na tlu (strunjača) sa nogama zgrčenim pod uglom od 90 stepeni. Dlanovi su ukršteni na potiljku sa laktovima razmaknutim u stranu. Partner čvrsto drži stopala kandidata. Kandidat izvodi podizanje trupa sa zasukom, naizmjenično u lijevu i desnu stranu što brže može, u intervalu od 30 sekundi. Pri tome mora dotaći laktom suprotno koljeno.
- 3) Ocjenjivanje: ocjenjuje se broj pravilno izvedenih i dovršenih dizanja u vremenu od 30 sekundi.

**c) Skok u dalj iz mjesta**

- 1) Instrumenti: tatami strunjače i čelična traka za mjerenje.
- 2) Zadatak: kandidat se odražava sunožno sa linije obilježene na parketu i doskače na strunjaču što može dalje, obavezan je sunožan doskok. Izvode se dva pokušaja, a nepravilno izvedeni skokovi se ponavljaju. Skok se izvodi iz sunožnog položaja stopala. Dozvoljeno je podizanje na prste prije skoka. Dupli odraz nije dozvoljen. Kandidat izvodi dva pokušaja. Ocjenjuje se bolji rezultat.
- 3) Ocjenjivanje: mjeri se dužina skoka normalno na odraznu liniju. Boduje se bolji rezultat izmjeren u centimetrima.

**d) Taping test**

- 1) Instrumenti: sto standardnih dimenzija, štoperica i taping krugovi od šperploče.
- 2) Zadatak: kandidat sjeda na stolicu nasuprot daske za taping. Dlan lijeve ruke stavlja na sredinu daske. Desnu ruku prekrsti preko lijeve i dlan postavi na lijevu ploču na dasci (ljevoruki postave ruke obratno). Noge kandidata su razmaknute i punim stopalima postavljene na tlo. Kandidat u vremenu od 20 sekundi, što brže može dodiruje prstima desne ruke (ljevoruki lijeve) naizmjenično jednu pa drugu ploču na dasci. Test se mjeri samo jednom. Zadatak se ne uvježbava.
- 3) Ocjenjivanje: rezultat u testu je broj pravilno izvedenih naizmjeničnih udaraca prstiju kandidata po pločama daske za taping u vremenu od 20 sekundi.

**e) Magont (okretnost na tlu)**

- 1) Vrijeme rada: za jednog kandidata – četiri minute.
- 2) Broj ispitivača: jedan ispitivač.
- 3) Instrumenti: četiri strunjače dimenzije (2x1 metar), jedan džudo kimono propisno smotan i štoperica.
- 4) Opis mjesta izvođenja: zadatak se izvodi u prostoriji ili otvorenom prostoru minimalnih dimenzija 8x4 metra. Tri strunjače su uzdužno nastavljene jedna na drugu, a četvrta je postavljena okomito na kraju treće strunjače (u obliku latiničnog slova „L“). Na kraju četvrte strunjače je propisno složen kimono.
- 5) Zadatak: kandidat leži potrbuške, poprečno na prvoj strunjači potpuno opružen, sa rukama ispruženim naprijed. Na znak za start, kandidat se koluta bočno preko tri postavljene strunjače. Kad čitavim tijelom dođe na četvrtu strunjaču postavi se četvoronoške i ide natraške (četvoronoške), preko četvrte strunjače do kimona, obuhvati kimono koljenima bez pomoći ruku (bez okretanja) i ponovo se četvoronoške vraća do treće strunjače. Okreće se za 90 stepeni, leđima prema prvoj strunjači (kimono je i dalje među nogama) i koluta se unazad do kraja prve strunjače. Zadatak je završen kada kandidat poslije tačno obavljenog zadatka pređe bilo kojim dijelom tijela rub posljednje strunjače.
- 6) Ocjenjivanje: mjeri se vrijeme u stotim djelovima sekunde od znaka za start do momenta kada kandidat kolutanjem pređe bilo kojim dijelom tijela rub posljednje strunjače.

**f) Koverta test**

- 1) Instrumenti: strunjače 3x5 metara, stalci - pet komada i štoperica.
- 2) Zadatak: radni podij je pravougaonik dimenzija 3x5 metara. Na svakom uglu nalazi se po jedan stalak koji uokviruje navedeni pravougaonik i u sredini pravougaonika nalazi se centralni stalak. Kandidat stoji sa vanjske strane stalka (lijevi ili desni). Na znak za start, trči oko oba stalka s vanjske strane, prema sredini (oko stalka) u obliku broja „8“ oko druga dva vanjska stalka i opet oko srednjeg stalka, pa dolazi do pozicije početnog položaja. U jednom mjerenju kandidat ima zadatak da tri puta istrči stazu u obliku broja „8“.

**g) Kuperov test (test trčanja 12 minuta)**

- 1) Instrumenti: štoperica i pištaljka.
- 2) Zadatak: kandidat sa cilja iz visokog starta kreće na znak pištaljke, sa zadatkom da pretrči ili prehoda što više metara za 12 minuta po atletskoj ili drugoj pogodnoj stazi za trčanje.
- 3) Ocjenjivanje: mjeri se pređena dužina u metrima.

**h) Trčanje 100 metara**

- 1) Instrumenti: štoperica i pištaljka.
  - 2) Zadatak: kandidat sa cilja, iz visokog starta, kreće na znak pištaljke, sa ciljem da pretrči najbrže što može dionicu od 100 metara po atletskoj ili drugoj pogodnoj stazi za trčanje.  
Kandidat ne smije izlaziti van svoje atletske pruge i ne smije ometati druge kandidate.
  - 3) Ocjenjivanje: mjeri se vrijeme potrebno da kandidat pretrči zadanu dionicu.
- (5) Testovi iz stava (4) tač. e) i f) izvode se dva puta i boduje se bolji rezultat.
- (6) Testovi fizičke sposobnosti vrednuju se na osnovu postignutih rezultata, bodovima od 0 do 5 za svaki test, tako da je ukupan broj mogućih bodova na testovima fizičke sposobnosti 40.
- (7) Kandidat nije zadovoljio test fizičkih sposobnosti ukoliko su dva testa vrednovana sa nula bodova, bez obzira na ukupno ostvaren broj bodova na testovima fizičke sposobnosti, odnosno ukoliko ostvari manje od 24 boda za prvi nivo – čin policajac, ili manje od 30 bodova za drugi nivo – čin mlađi inspektor, isključuje se iz daljeg procesa odabira.
- (8) Normativi procjene fizičke sposobnosti su sljedeći:

**a) Sklekovi za 10 sekundi**

POL	BODOVI					
	0	1	2	3	4	5
MUŠKARCI	8 i <	9	10	11	12	13 i >
ŽENE	5 i <	6	7	8	9	10 i >

**b) Pretkloni za 30 sekundi**

POL	BODOVI					
	0	1	2	3	4	5
MUŠKARCI	15 i <	16-17	18-19	20-21	22-23	24 i >
ŽENE	11 i <	12-13	14-15	16-17	18-19	20 i >

**c) Skok u dalj iz mjesta**

POL	BODOVI					
	0	1	2	3	4	5
MUŠKARCI	209 i <	210-219	220-229	230-239	240-249	250 i >
ŽENE	149 i <	150-159	160-169	170-179	180-189	190 i >

d) Taping test za 20 sekundi

POL	BODOVI					
	0	1	2	3	4	5
MUŠKARCI	30 i <	31-34	35-38	39-42	43-46	47 i >
ŽENE	28 i <	29-32	33-36	37-40	41-44	45 i >

e) Magont

POL	BODOVI					
	0	1	2	3	4	5
MUŠKARCI	18,01 i >	18,00 - 17,01	17,00 - 16,01	16,00 - 15,01	15,00 - 14,01	14,00 i <
ŽENE	19,01 i >	19,00 - 18,01	18,00 - 17,01	17,00 - 16,01	16,00 - 15,01	15,00 i <

f) Koverta test

POL	BODOVI					
	0	1	2	3	4	5
MUŠKARCI	30,01 i >	30,00 - 28,01	28,00 - 26,01	26,00 - 24,01	24,00 - 22,01	22,00 i <
ŽENE	32,01 i >	32,00 - 30,01	30,00 - 28,01	28,00 - 26,01	26,00 - 24,01	24,00 i <

g) Kuperov test

BODOVI	MUŠKARCI	ŽENE
0	2399 i <	1699 i <
1	2400 – 2600	1700 - 1800
2	2601 – 2800	1801 - 1900
3	2801 – 3000	1901 - 2000
4	3001 – 3200	2001 - 2100
5	3201 i >	2101

h) Trčanje 100 m

POL	BODOVI					
	0	1	2	3	4	5
MUŠKARCI	15,20 i >	15,19 - 14,61	14,60 - 13,81	13,80 - 13,31	13,30 - 12,51	12,50 i <
ŽENE	18,20 i >	18,19 - 17,61	17,60 - 16,81	16,80 - 16,31	16,30 - 15,51	15,50 i <

**Član 8.**  
**(Ocjena testa fizičke sposobnosti)**

(1) Test fizičke sposobnosti kandidata ocjenjuje se od 1 do 5, prema broju ostvarenih bodova, kako slijedi:

- a) za polaznike osnovne obuke za prvi nivo - čin policajac:
  - 1) do 23 boda.....ocjena 1;
  - 2) od 24 do 30 bodova.....ocjena 2;
  - 3) od 31 do 34 bodova.....ocjena 3;
  - 4) od 35 do 37 bodova.....ocjena 4;
  - 5) od 38 do 40 bodova.....ocjena 5.
- b) za polaznike osnovne obuke za drugi nivo - čin mlađi inspektor:
  - 1) do 29 bodova.....ocjena 1;
  - 2) od 30 do 32 bodova.....ocjena 2;
  - 3) od 33 do 35 bodova.....ocjena 3;
  - 4) od 36 do 38 bodova.....ocjena 4;
  - 5) od 39 do 40 bodova.....ocjena 5.

(2) Kandidat koji bude ocijenjen ocjenom 1, odnosno na testu fizičke sposobnosti ostvari manje od 24 boda za prvi nivo-čin policajac ili manje od 30 bodova za drugi nivo - čin mlađi inspektor, isključuje se iz daljnjeg postupka izbora kandidata.

### **Član 9. (Eliminacioni prag)**

(1) Eliminacioni prag predstavlja broj bodova koji je dovoljan za uspjeh kandidata na testu i sticanje prava za pristupanje narednom testu.

(2) Eliminacioni prag predstavlja:

a) za prvi nivo - čin policajac, najmanje 60% od maksimalnog broja bodova koje kandidat može ostvariti na testu opšteg znanja, uključujući test fizičke sposobnosti.

b) za drugi nivo - čin mlađi inspektor, najmanje 75% od maksimalnog broja bodova koje kandidat može ostvariti na testu opšteg znanja, uključujući test fizičke sposobnosti.

(3) Ukoliko kandidat ne pređe eliminacioni prag na navedenim testovima, gubi pravo da pristupi narednom testu i isključuje se iz daljnjeg postupka izbora.

### **Član 10. (Provjera zdravstvenog stanja)**

(1) Provjeru zdravstvenog stanja koja podrazumijeva ljekarski pregled i psihološki pregled, uključujući test i intervju, vrši ovlaštena zdravstvena ustanova koju odabere direktor Agencije.

(2) U slučaju da kandidat ne zadovolji na provjeri zdravstvenog stanja eliminiše se iz daljeg postupka izbora. Komisija na provjeru zdravstvenog stanja upućuje sljedećeg uspješnog kandidata sa rang liste.

### **Član 11. (Test poznavanja stranog jezika)**

(1) Kandidat je obavezan poznavati jedan od stranih jezika.

(2) Testiranje opšteg poznavanja stranog jezika uključuje:

a) pismeni test;

b) test govora.

(3) Pismeni test sadrži pitanja na osnovu kojih se procjenjuje sposobnost i vještina razumjevanja stranog jezika, pismenog izražavanja i poznavanja jezičkih pravila i zakonitosti.



(4) Test govora se provodi na način da se kandidatu sa liste pitanja usmeno postavi pet pitanja na koja je dužan usmeno odgovoriti na stranom jeziku kako bi se procijenila sposobnost kandidata da učestvuje u razgovoru na stranom jeziku (govorna interakcija) i sposobnost samostalnog govora na stranom jeziku (govorna produkcija).

(5) Pismeni test sadrži 45 pitanja, koji se ocjenjuje ocjenom od 1 do 5, prema broju ostvarenih bodova, kako slijedi:

- a) do 25 bodova .....ocjena 1;
- b) od 26 do 29 bodova.....ocjena 2;
- c) od 30 do 35 bodova.....ocjena 3;
- d) od 36 do 40 bodova.....ocjena 4;
- e) od 41 do 45 bodova.....ocjena 5.

(6) Kandidat koji na pismenom testu bude ocijenjen ocjenom 1, odnosno ostvari manje od 26 bodova, isključuje se iz daljeg postupka izbora.

(7) Test govora se ocjenjuje tako da se svaki odgovor ocjenjuje ocjenom od 1 do 5. Prosječna ocjena testa govora se sabira sa ocjenom pismenog testa i podijeljena sa dva, čini konačnu ocjenu provjere znanja stranog jezika.

(8) Kandidat ocijenjen ocjenom 1 na pismenom testu ili testu govora isključuje se iz daljnjeg postupka izbora.

(9) Sadržaj testa utvrđuje Komisija.

## **Član 12.** **(Usmeni test-intervju)**

(1) Usmeni test - intervju provodi se na sljedeći način:

a) svaki član Komisije učestvuje u usmenom testu-intervjuu i ocjenjuje kandidata ocjenom od 1 do 5, uz objašnjenje. Rezultat usmenog testa je zbir bodova-ocjena svih članovi Komisije, podijeljen sa brojem članova Komisije i pomnožen sa koeficijentom 3.

b) usmeni test - intervju omogućava da se o kandidatu stvori objektivna slika vezano za njegovu sposobnost da se školuje i osposobi za rad na radnom mjestu u okviru Agencije, uključujući i sljedeće specifične sposobnosti:

- 1) stečeno obrazovanje;
- 2) stil izražavanja;
- 3) konverzaciju;
- 4) afinitet za timski rad;
- 5) međunacionalnu, religijsku, kulturnu i etničku saradnju;
- 6) dostignuća u nauci, umjetnosti i sportu.

(2) Sadržaj testa utvrđuje Komisija.

(3) Maksimalan broj bodova koje je moguće ostvariti na usmenom testu-intervjuu je 15, odnosno uspjeh za prolaz postiže kandidat koji ostvari 9 bodova i više.

## **Član 13.** **(Ocjena usmenog testa - intervju)**

(1) Usmeni test - intervju ocjenjuje se ocjenom od 1 do 5, prema broju ostvarenih bodova, kako slijedi:

- a) do 8 bodova.....ocjena 1;
- b) od 9 do 10 bodova.....ocjena 2;
- c) od 11 do 12 bodova.....ocjena 3;
- d) od 13 do 14 bodova.....ocjena 4;
- e) 15 bodova.....ocjena 5.

(2) Kandidat koji bude ocijenjen ocjenom 1, odnosno na usmenom testu - intervjuu ostvari manje od 9 bodova, isključuje se iz daljnjeg postupka izbora.

**Član 14.**  
**(Bodovanje uspješnosti kandidata u procesu izbora)**

(1) Bodovanje uspješnosti kandidata u procesu izbora kandidata za polaznike osnovne obuke za prvi nivo - čin policajac vrši se na sljedeći način:

Segment testiranja	Maksimalni broj bodova - maksimalna ocjena	Minimalni broj bodova - minimalna ocjena
Test opšteg znanja	40 bodova - ocjena 5	24 boda - ocjena 2
Test fizičke sposobnosti	40 bodova - ocjena 5	24 boda - ocjena 2
Test poznavanja stranog jezika	45 bodova - ocjena 5	26 bodova - ocjena 2
Usmeni test - intervju	15 bodova - ocjena 5	9 bodova - ocjena 2
UKUPNO	140 bodova	83 bodova

(2) Bodovanje uspješnosti kandidata u postupku izbora kandidata za polaznike osnovne obuke za drugi nivo - čin mlađi inspektor vrši se na sljedeći način:

Segment testiranja	Maksimalni broj bodova – maksimalna ocjena	Minimalni broj bodova – minimalna ocjena
Test opšteg znanja	40 bodova - ocjena 5	30 bodova - ocjena 2
Test fizičke sposobnosti	40 bodova - ocjena 5	30 bodova - ocjena 2
Test poznavanja stranog jezika	45 bodova - ocjena 5	26 bodova - ocjena 2
Usmeni test - intervju	15 bodova - ocjena 5	9 bodova - ocjena 2
UKUPNO	140 bodova	95 bodova

(3) Kandidati na ljeakarskom i psihološkom pregledu se ne boduju, već se daje opisna ocjena „zadovoljava“ ili „ne zadovoljava“.

**Član 15.**  
**(Osnov za sačinjavanje rang liste)**

Konačan rezultat testiranja predstavlja polaznu osnovu za sačinjavanje rang liste kandidata za polaznike osnovne obuke - kadeta za prvi nivo - čin policajac i drugi nivo - čin mlađi inspektor Agencije, na osnovu ostvarenih bodova -ocjena.

**DIO TREĆI -TESTIRANJE KANDIDATA ZA POLAZNIKE OSNOVNE OBUKE-  
KADETA ZA PRVI NIVO - ČIN POLICAJAC U JEDINICI ZA  
SPECIJALNU PODRŠKU**

**Član 16.**

**(Selekcija kandidata za polaznike osnovne obuke - kadeta u Jedinici za specijalnu podršku)**

(1) Zbog specifičnosti poslova i zadataka koje obavljaju policijski službenici Jedinice za specijalnu podršku Agencije (u daljem tekstu: JSP) kandidati za prvi nivo-čin policajac pored provjera iz člana 3. stav (1) tač. a), b), c) i d) ove odluke, prolaze i usmeni test-intervju i test psihofizičke izdržljivosti kandidata u ekstremnim situacijama.

(2) Svi prijavljeni kandidati testiraju se u skladu sa kriterijima propisanim odredbama čl. 18., 19., 20., 21., 22., 23., 24. i 25. ove odluke.

**Član 17.**

**(Morfološki status)**

(1) Kandidat prije testiranja mora da zadovoljava kriterije koji se odnose na morfološki status i to:

Tjelesna visina : 175 cm i više
Tjelesna težina: +10 i –10 kg u odnosu na visinu u cm - 100

(2) Na kriterij morfološkog statusa kandidata primjenjuju se odredbe člana 4. st. (2) i (3) ove odluke.

**Član 18.**

**(Test opšteg znanja)**

Testiranje opšteg znanja kandidata za polaznike osnovne obuke - kadeta u JSP provodi se u skladu sa članom 5. ove odluke.

**Član 19.**

**(Ocjena testa opšteg znanja)**

(1) Test opšteg znanja za polaznike osnovne obuke - kadeta u JSP ocjenjuje se ocjenom od 1 do 5, prema broju ostvarenih bodova, kako slijedi:

- a) do 23 boda.....ocjena 1;
- b) od 24 do 30 bodova.....ocjena 2;
- c) od 31 do 34 bodova.....ocjena 3;
- d) od 35 do 37 bodova.....ocjena 4;
- e) od 38 do 40 bodova.....ocjena 5.

(2) Kandidat koji bude ocijenjen ocjenom 1, odnosno na testu opšteg znanja ostvari manje od 24 boda, isključuje se iz daljnjeg postupka izbora.

## **Član 20.** **(Test fizičke sposobnosti)**

(1) Testiranje fizičke sposobnosti sastoji se od mjerenja nivoa motoričkih sposobnosti kandidata upotrebom standardizovanih testova i normativnih tablica. Kod normativa procjene motoričkih sposobnosti boduje se svih devet testova skalom od 0 do 5 bodova, pri čemu je moguće ostvariti maksimalno 45 bodova. Da bi zadovoljio nivo prolaznosti, kandidat mora ispunjavati kriterije predviđene testovima provjere fizičke sposobnosti, te ostvariti minimalno 27 bodova, a da pri tom nije ocijenjen ni na jednom od testova sa nula bodova. Ako je kandidat na jednom od testova ocijenjen sa nula bodova ili odustane od testiranja ili prekine izvođenje testa, smatra se da nije zadovoljio nivo prolaznosti, bez obzira na ukupno ostvaren broj bodova na testovima fizičke sposobnosti i isključuje se iz daljnjeg postupka izbora.

(2) Testiranje fizičke sposobnosti kandidata provodi se na sljedeći način:

### **a) Zgibovi nathvatom**

- 1) Vrijeme rada: jedan minut.
- 2) Instrumenti: vratilo, stolica i štoperica sa 1/10 sekundi.
- 3) Zadatak: kandidat se popenje na stolicu i rukama u širini ramena hvata šipku vratila nathvatom, pri čemu su mu tijelo, noge i ruke vertikalno opruženi. Ispitivač izmakne stolicu, nakon čega se kandidat iz početnog položaja podiže, savijajući ruke u laktovima, tako da mu brada dođe iznad šipke vratila. Tijelo za vrijeme izvođenja ostaje opruženo. Zadatak kandidata je da pravilne zgibove izvede što više puta za jedan minut. Za vrijeme rada nije dopušteno da se kandidat pomaže nogama i tijelom pri podizanju (njihanje nije dozvoljeno). Ukoliko se tijelo kandidata zanjše, ispitivač ga umiruje u momentu kada se kandidat spušta. Kandidat ne smije praviti pauzu između podizanja.
- 4) Ocjenjivanje: ocjenjuje se broj pravilno izvedenih zgibova u jednoj minuti.

### **b) Sklekovi**

- 1) Vrijeme rada: jedan minut.
- 2) Potrebna sredstva: ravna podloga i štoperica.
- 3) Zadatak: kandidat zauzima početni položaj na rukama tako da prstima nogu i dlanovima dodiruje podlogu. Iz početnog položaja kandidat se spušta do vodoravnog položaja tako da u donjoj poziciji grudima dodiruje podlogu i da su mu laktovi iznad leđa, a prilikom podizanja i spuštanja laktovi moraju biti uz tjelo. Ponavljanja se izvode bez pauze. Bilježi se maksimalan broj ponavljanja. Nije dozvoljeno zadržavanje kandidata u gornjoj poziciji.

### **c) Pretkloni trupom**

- 1) Vrijeme rada: jedan minut.
- 2) Instrumenti: strunjača i štoperica.
- 3) Zadatak: kandidat leži na leđima, na tlu (strunjača), s nogama zgrčenim pod uglom od 90 stepeni. Dlanovi su mu ukršteni na potiljku, sa laktovima razmaknutim u stranu. Asistent čvrsto drži stopala kandidata. Kandidat izvodi podizanje trupa sa zasukom, naizmjenično u lijevu i desnu stranu što brže može, u intervalu od jedan minut. Pri tom mora dotaći laktom suprotno koljeno. Kandidat pri povratku u početni položaj mora svaki put sa oba laktova dotaći strunjaču a da se pri tom ne pomaže odgurujući se od nje, podižući kukove ili povlačiti se nogama prema asistentu.
- 4) Ocjenjivanje: ocjenjuje se broj pravilno izvedenih i dovršenih dizanja u vremenu od jedan minut.

### **d) Penjanje uz konopac**

- 1) Potrebna sredstva: konopac dužine pet metara i štoperica.
- 2) Zadatak: kandidat sjedi na podu sa prekrštenim nogama a jednom rukom se drži za konopac dužine pet metara. Na znak za start, kandidat se proizvoljnom

tehnikom penje uz konopac do kraja istog. Zadatak je završen kada kandidat jednom rukom dodirne kraj konopca dužine pet metara.

- 3) Ocjenjivanje: mjeri se vrijeme u stotim dijelovima sekunde potrebno za izvršenje zadatka.

**e) Osmica sa saginjanjem**

- 1) Potrebna sredstva: dva stalka sa stabilnim postoljem visine najmanje 120 centimetara i elastična traka bijele boje duga četiri metra.
- 2) Opis mjesta izvođenja: zadatak se izvodi u prostoriji ili na otvorenom prostoru sa ravnom i čvrstom podlogom, minimalnih dimenzija 8x4 metra. Stalci su postavljeni na udaljenost od četiri metra, a između njih je razapeta elastična traka.
- 3) Početni stav: kandidat stoji u poziciji visokog starta pokraj jednog stalka okrenut u pravcu drugog. Prsti prednje noge su mu u ravnini stalka pokraj kojeg stoji. Elastična traka je zategnuta i postavljena u visini najvišeg ruba karlice kandidata.
- 4) Zadatak: na znak za start kandidat najbrže što može obilazi stalke slijedeći zamišljenu liniju položenog broja „8“, saginjući se svaki put ispod razapete elastične trake. Ukoliko kandidat dodirne elastičnu traku koja je razapeta između dva stalka, biće upozoren da to ne čini, a ukoliko nastavi vrijeme tog pokušaja biće poništeno.
- 5) Kraj izvođenja zadatka: nakon što kandidat obiđe oko stalaka na opisani način četiri puta i protrči pokraj stalka koji je služio za start, zadatak je završen.
- 6) Ocjenjivanje: mjeri se vrijeme u stotim dijelovima sekunde potrebno za izvršenje zadatka.

**f) Magont test**

- 1) Vrijeme rada: za jednog kandidata - četiri minute.
- 2) Potrebna sredstva: četiri strunjače dimenzija 2x1 metar, džudo kimono propisno smotan i štoperica.
- 3) Opis mjesta izvođenja: zadatak se izvodi u prostoriji ili otvorenom prostoru minimalnih dimenzija 8x4 metra. Tri strunjače su uzdužno nastavljene jedna na drugu, a četvrta je postavljena okomito na kraju treće strunjače (u obliku latiničnog slova „L“). Na kraju četvrte strunjače je propisno složen kimono.
- 4) Zadatak: kandidat leži potrbuške, poprečno na prvoj strunjači potpuno opružen, sa rukama ispruženim naprijed. Na znak za start kandidat se koluta bočno preko tri postavljene strunjače. Kad čitavim tijelom dođe na četvrtu strunjaču postavi se četvoronoške i ide natraške (četvoronoške), preko četvrte strunjače do kimona, obuhvati kimono koljenima bez pomoći ruku (bez okretanja) i ponovo se četvoronoške vraća do treće strunjače. Okreće se za 90 stepeni, leđima prema prvoj strunjači (kimono je i dalje među nogama) i koluta se unazad do kraja prve strunjače.
- 5) Kraj izvođenja zadatka: zadatak je završen kada kandidat poslije tačno obavljenog zadatka pređe bilo kojim dijelom tijela rub posljednje strunjače.
- 6) Ocjenjivanje: mjeri se vrijeme u stotim dijelovima sekunde od znaka za start do momenta kada kandidat kolutanjem pređe bilo kojim dijelom tijela rub posljednje strunjače.

**g) Kuperov test**

- 1) Instrumenti: štoperica i pištaljka.
- 2) Zadatak: kandidat sa cilja, iz visokog starta, kreće na znak pištaljke, sa ciljem da pretrči ili prehoda što više metara za 12 minuta po atletskoj ili drugoj pogodnoj stazi za trčanje.
- 3) Ocjenjivanje: mjeri se pređena dužina u metrima.

### **h) Trčanje 100 metara**

- 1) Instrumenti: štoperica i pištaljka.
- 2) Zadatak: kandidat sa cilja, iz visokog starta, kreće na znak pištaljke, sa zadatkom da pretrči najbrže što može dionicu od 100 metara po atletskoj ili drugoj pogodnoj stazi za trčanje. Kandidat ne smije izlaziti van svoje atletske pruge i ne smije ometati druge kandidate.
- 3) Ocjenjivanje: mjeri se vrijeme potrebno da kandidat pretrči zadanu dionicu.

### **i) Plivanje 50 metara**

- 1) Instrumenti: pruga za plivanje dužine 50 ili 25 metara, štoperica i pištaljka.
  - 2) Zadatak: kandidat sa startnog bloka na znak mjerioca skače (na glavu ili na noge) u bazen i pliva slobodnim stilom sa ciljem da što brže prepliva dionicu od 50 metara. Kandidat se za vrijeme plivanja ne smije odmarati tako da se drži za plivačku prugu ili za drugi kraj bazena ukoliko se pliva u bazenu dužine 25 metara.
  - 3) Ocjenjivanje: Mjeri se vrijeme koje je potrebno kandidatu da prepliva dionicu od 50 metara. Vrijeme se mjeri u stotim dijelovima sekunde.
- (3) Testovi iz stava (2) tač. a), b), c), g), h) i i) ovog člana izvode se jednom, dok se testovi iz tač. d), e) i f) izvode dva puta i boduje se bolji rezultat.
- (4) Normativi za procjenu fizičke sposobnosti kandidata za pripadnika JSP su sljedeći:

#### **a) Zgibovi nathvatom**

Broj bodova	0	1	2	3	4	5
Br. zgibova	7 i <	8-9	10-11	12-13	14-15	16 i >

#### **b) Sklekovi**

Broj bodova	0	1	2	3	4	5
Br. sklekova	23 i <	24-30	31-37	38-44	45-51	52 i >

#### **c) Pretkloni trupom**

Broj bodova	0	1	2	3	4	5
Br. pretklona	30 i <	31-35	36-41	42-48	49-54	55 i >

#### **d) Penjanje uz konopac**

Broj bodova	0	1	2	3	4	5
Vrijeme	12,01 i >	10,51-12,00	9,01-10,50	7,51-9,00	6,01-7,50	6,00 i <

#### **e) Osmica sa saginjanjem**

Broj bodova	0	1	2	3	4	5
Vrijeme	20,01 i >	20,00-19,01	19,00-18,01	18,00-17,01	17,00-16,01	16,00 i <

#### **f) Magont test**

Broj bodova	0	1	2	3	4	5
Vrijeme	18,01 i >	18,00-17,01	17,00-16,01	16,00-15,01	15,00-14,01	14,00 i <

#### **g) Kuperov test**

Broj bodova	0	1	2	3	4	5
Dužina u m.	2599 i <	2600-2749	2750-2899	2900-3059	3060-3199	3200 i >

h) Trčanje 100 m

Broj bodova	0	1	2	3	4	5
Vrijeme	14,20 i >	14,19-13,78	13,77-13,36	13,35-12,92	12,91-12,51	12,50 i <

i) Plivanje 50 m

Broj bodova	0	1	2	3	4	5
Vrijeme	56,01 i >	56,00-52,01	52,00-48,01	48,00-44,01	44,00-40,01	40,00 i <

**Član 21.**  
**(Ocjena testa fizičke sposobnosti)**

(1) Test fizičke sposobnosti za polaznike osnovne obuke - kadeta u JSP ocjenjuje se ocjenom od 1 do 5, prema broju ostvarenih bodova, kako slijedi:

- a) do 26 boda.....ocjena 1;
- b) od 27 do 30 bodova.....ocjena 2;
- c) od 31 do 35 bodova.....ocjena 3;
- d) od 36 do 40 bodova.....ocjena 4;
- e) od 41 do 45 bodova.....ocjena 5.

2) Kandidat koji bude ocijenjen ocjenom 1, odnosno na testu fizičke sposobnosti ostvari manje od 27 bodova, isključuje se iz daljnjeg postupka izbora.

**Član 22.**  
**(Eliminacioni prag)**

(1) Kandidat za polaznika osnovne obuke za prvi nivo - čin policajac u JSP obavezan je ostvariti eliminacioni prag iz člana 9. stav (2) tačka a) ove odluke.

(2) U slučaju da kandidat ne pređe eliminacioni prag iz stava (1) ovog člana, postupa se u skladu sa odredbom člana 9. stav (3) ove odluke.

**Član 23.**  
**(Provjera zdravstvenog stanja)**

Provjera zdravstvenog stanja kandidata vrši se u skladu sa odredbom člana 3. stav (2) i članom 10. ove odluke.

**Član 24.**  
**(Usmeni test-intervju)**

(1) Usmeni test - intervju provodi se na način da svaki član Komisije učestvuje u usmenom testu - intervjuu i ocjenjuje kandidata ocjenom od 1 do 5 iz svake oblasti pojedinačno i to:

- a) obrazovanje i profesionalni razvoj;
- b) ambicije, navike i interesovanje za različite oblasti;
- c) profesionalna motivacija;
- d) verbalna i neverbalna komunikacija;
- e) osnovna obilježja ličnosti.

(2) Intervju se vrednuje tako što se sabrani bodovi članova Komisije podijele sa brojem članova Komisije, a dobijena vrijednost se uvrštava u tabelu skale broja bodova ostvarenih na intervjuu i predstavlja konačan broj bodova za kandidata, kako slijedi:

Bodovi	8	9	10	11	12	13	14	15
Rezultat	14	15	16-17	18-19	20-21	22-23	24	25

(3) Maksimalan broj bodova koje kandidat može ostvariti na intervjuu je 15. Prolazan uspjeh postiže kandidat koji ostvari 9 bodova i više.

(4) Svaki član Komisije dobija pripremljen formular za intervju sa parametrima koji se ocjenjuju i obavezan je dati kratak pismeni komentar.

### **Član 25.** **(Ocjena usmenog testa –intervjua)**

(1) Usmeni test - intervju ocjenjuje se ocjenom od 1 do 5 prema broju ostvarenih bodova kako slijedi:

- a) do 8 bodova.....ocjena 1;
- b) od 9 do 10 bodova.....ocjena 2;
- c) od 11 do 12 bodova.....ocjena 3;
- d) od 13 do 14 bodova.....ocjena 4;
- e) 15 bodova.....ocjena 5.

(2) Kandidat koji bude ocijenjen ocjenom 1, odnosno na usmenom testu - intervjuu ostvari manje od 9 bodova, isključuje se iz daljnjeg postupka izbora.

### **Član 26.** **(Test psihofizičke izdržljivosti u ekstremnim situacijama)**

(1) Testiranje psihofizičke izdržljivosti u ekstremnim situacijama podrazumijeva izlaganje kandidata psihofizičkoj napetosti u kojoj se od njega očekuje željeni oblik ponašanja. Tokom provjere kandidat rješava specifične zadatke, pri čemu je izložen konstantnim psihičkim i fizičkim naporima. Da bi kandidat uspješno završio zadatak, neophodno je da sluša uputstva i postupa u skladu sa njima.

(2) Testiranje iz stava (1) ovog člana traje sedam dana ili 140 časova na pogodnim terenima po Planu provjere psihofizičke izdržljivosti kandidata u ekstremnim situacijama koji donosi direktor Agencije na prijedlog JSP (u daljem tekstu: Plan).

(3) Tokom testiranja kandidat ima obezbjeđen smještaj i ishranu.

(4) Ocjena testa psihofizičke izdržljivosti u ekstremnim situacijama utvrđuje se na osnovu procjene ponašanja kandidata kroz aktivnosti određene Planom. Komisija prati ponašanje, vrednuje i evidentira poželjne oblike ponašanja u okviru parametara propisanih Planom.

(5) Svaki član Komisije dobija pripremljen obrazac sa parametrima koji se ocjenjuju, u koji će evidentirati zapažanja i procjenu ponašanja kandidata (poželjne i nepoželjne oblike ponašanja). Svaki član Komisije je obavezan dati kratak pismeni komentar i obrazloženje ocjene.

(6) Konačnu ocjenu uspješnosti kandidata donosi većinom glasova Komisija na posebnom obrascu, u prilogu koga se nalaze obrasci s pojedinačnim ocjenama svakog člana Komisije.

(7) Ocjenjivanje se vrši ocjenom „zadovoljava“ ili „ne zadovoljava“.

(8) Kandidat ocijenjen sa ocjenom ne zadovoljava isključuje se iz daljnjeg postupka izbora.



**Član 27.**  
**(Bodovanje uspješnosti kandidata)**

(1) Bodovanje uspješnosti kandidata u procesu izbora kandidata za polaznike osnovne obuke - kadeta za prvi nivo - čin policajac u JSP, vrši se na sljedeći način:

Segment testiranja	Maksimalan broj bodova - maksimalna ocjena	Minimalan broj bodova - minimalna ocjena
Test opšteg znanja	40 bodova - ocjena 5	24 bodova - ocjena 2
Test fizičke sposobnosti	45 bodova - ocjena 5	27 bodova - ocjena 2
Usmeni test - intervju	15 bodova - ocjena 5	9 bodova - ocjena 2
UKUPNO	100 bodova	60 bodova

(2) Kandidati na ljeakarskom i psihološkom pregledu kao i na testu psihofizičke izdržljivosti u ekstremnim situacijama se ne boduju, već se daje opisna ocjena „zadovoljava“ ili „nezadovoljava“.

**Član 28.**  
**(Osnov za sačinjavanje rang liste)**

Konačan rezultat testiranja predstavlja polaznu osnovu za sačinjavanje rang liste kandidata za polaznike osnovne obuke - kadeta za prvi nivo - čin policajac za JSP Agencije, na osnovu ostvarenih bodova.


**DIO ČETVRTI – ZAVRŠNE ODREDBE**

**Član 29.**  
**(Stavljanje van snage)**

Stupanjem na snagu ove odluke stavlja se van snage Odluka o metodu, načinu i sistemu bodovanja testiranja kandidata za polaznike osnovne obuke - kadeta u Državnoj agenciji za istrage i zaštitu broj: 16-09-02-3235-5/14 od 10.09.2014. godine.

**Član 30.**  
**(Stupanje na snagu)**

Ova odluka stupa na snagu danom donošenja.





OBRAZAC BR.1

# IZJAVA

## O DOBROVOLJNOM PRISTUPANJU TESTOVIMA FIZIČKE SPOSOBNOSTI

Ja \_\_\_\_\_, izjavljujem da dobrovoljno pristupam testovima fizičke sposobnosti u postupku odabira kandidata za polaznike osnovne obuke – kadeta u Državnoj agenciji za istrage i zaštitu, te da sam upoznat da u slučaju mog povređivanja Državna agencija za istrage i zaštitu ne snosi odgovornost.

KANDIDAT

---

I. Sarajevo \_\_\_\_\_